

Johresbricht Saison 2024/25

Johresbricht 2024/2025 vom Leiter JO-Allgemein, Skiclub Stenegg

Wie plaaned hend mer am Fritig vo de letschte HV, em 25 Oktober mit 53 Goofe döfe id JO-Turnsaison starte. Es het mi gfreut, dass me wiede mit vier Gruppe hend chönne i de Halle se. Da hässt, dass de Dario bi de öltische Gruppe e glungni Sach het chöne ufbaue ond die junge Fraue ond Manne cha bhalte!

De Start is Schneetraining hemer feen wegem fehlende Schnee escht mitme Woche Verspötig gmacht. Am 14. Dezember hemer em grosse Ufwand von Horn d'JO gstartet, au wenn Piste escht bis halb uni offe gse sönd. De Schneemangel het sich denn bis ad Wiehnacht döri zoge. Apropos Wiehnacht. Fö emol hend mer s'Chlausturne emol andescht gmacht. Me hend döre en Ossealass bi de Ölis obe gnüsse. Mit Spiel, Spass ond natürlich em feine Gritibenz. I globe es hend alli de Plausch ka, au wenn de eint ode ande Skiazog noch id Wösch het mösse.

Närrisch isches denn am 22 Februar wiede gse. Uf de Ebenalp obe sönd wiede verkleideti Bäre, Tiger ond Clown öbe Piste gflitzt. Fö de obligat Berliner hend me i de Clubhütte döre se ond de Höttebese het ös mit Sirup vesoged. Ganz e hezlichs vegöllts Gott a dere Stöll an Rolli! Me vo de JO schätzid ond gnüssid dini Gastfründschaft all wiede vo heeze. A dem Wocheend isches Schlag uf Schlag wite gange. Am Sonntig isch zom Club- aus s'JO-Renne gse. Det heme da, wo me a de Öed bi Fluetliecht ond a de Sämstig trainierthend, im Stangewald chöne zom Beste ge.

Noch Total 11 Schneetrainings hend mer am 29. Meez denn sletscht Skifahre ka. Endgültig id Sommepause sömme am 25. Mai mitem JO Tag. S'Wetter hets damol leide nüd ganz guet mit ös gment. Drom sönd mer chozerhand bi de Turnhalle Stenegg blebe ond hend en coole OL döre mache. E feini Wost vom Grill ond e riesigs Dessertbuffet het natürlich au nüd gfählt.

Leiter:

Die schöne Stonde mit ond vö ösen Nachwuchs wärid nüd möglich ohni di tatchräftig vo de Leiterinne ond Leiter. I möchts abe nüd ondeloh, mi au a dere Stöll ganz herzlich bi allne zbedanke, wo sich ebe en Fritig Obed ode Samstignomittag engagiert hend.

Miteme Leiterplan hends me wiede gschafft, alli plante ond mögliche Training dörizföhre. Au i de letschte Saison heme wiede mit vorbereitete Trainingsplän gschaffed ond hend eso chöne dLeiter ondestütze, abe au de rot Fade id Schneetraining ka. Sowohl i de Halle, wie au ufem Schnee bini au hüür wiede dankbar wenn er eu de Eint ode de Ande Isatz is Aug fassid. En J+S Kurs ischt schö, ab nüd zwingend. Sölbvestendlich isch au hüür deTrainingsplan do ond i freu mi, wenne de no ebe guet wörid völle.

Uusblick:

Au hüür söme bereits gescht Obed sescht Mol i de Halle gstande ond scho bald isch au scho dJugi Olympiade. Det schinneme nüd gad mit de Leistig, sondern me kennt ös au vo witem mit ösere schöne T-Shirt.

Wenn dFrau Holle hüür wiede zögig id Geng chont, startid me am 06 Dezembe is Schneetraining. Me plangerid abe scho jetzt Fall uf vieli spannendi ond lehrricht Stönd i de Halle ond ufem Schnee.

Ski Heil!

26. Oktober 2024, Leiter JO-Allgemein
Andreas Breitenmoser